



Fundasaun Mahein (FM), 08 Agustu 2022

Komunikadu Imprensa

COVID-19 & Seguransa Umanu iha Timor-Leste

Relatoriu ida ne'e bazeia ba peskiza ne'ebé Fundasaun Mahein (FM) hala'o durante 2021 no 2022 kona-bá esperiensa insecuransa durante pandemia COVID-19 iha Timor-Leste. Relatoriu ne'e completa FM nia peskiza, analise no publikasaun sira seluk liga ho asuntu COVID-19. Relatoriu mos dokumenta FM nia peskiza orijinal. FM halibur dadus kona-bá ema nia esperiensa pesoal liu-husi intervista no diskusaun iha grupu. Ami mos halo analiza kona-bá implikasaun husi krize COVID-19 ba Timor-Leste nia dezenvolvimentu ekonomiku, seguransa, demokrasia no direitus umanus. Impaktu negative oi-oin mosu husi meius COVID-19 nian, hanesan terus sosio-ekonomiku, insecuransa ai-han, menus asesu ba servisus esensiais, edukasaun interonpidu, stres psikolojiku, violensia bazeia ba jeneru no violasaun direitus umanus komete husi forsa seguransa estadu.

Komesa iha Marsu 2020, Governu Timor-Leste (GoTL) implementa meius estraordinariu balun hodi responde ba ameasa saúde públiku COVID-19. Momentu ne'ebá, FM konkorda katak nesesáriu duni tanba falta koñesimentu kona-bá moras ne'e, no Timor-Leste nia sistema saúde menus kapasidade. Maibé, FM mos fó avizu kona-bá impaktu ekónomicu no seguransa husi meius kontra COVID-19. Ema barak gava GoTL nia resposta ba COVID-19, dehan efetívu tebes no konsege salva ema barak nia vida.

Maibé tuir tempu FM nia preokupasaun sa'e tanba ami observa katak política kontra COVID-19 mos kria terus boot ba populasaun Timor-oan barak, tanba kria impaktu ba seguransa ekónomicu no ben-estar fíziku no psikolojiku, halo povu barak la fier autoridade no provoka konflitu sosial. GoTL, sosiedade sivil no ajénsia internasional balun rekoñese ona impaktu negativu balun ne'ebé mosu husi meius kontra COVID-19. Maibé, FM nafatin preokupa katak seidauk iha rekoñesimentu ne'ebé suficiente kona-bá povu nia terus ne'e iha nível diskusaun públiku. Nune'e mos, debate internasional la'o hela kona-bá efikásia meius kontra COVID-19 hanesan "lockdown", no mos kona-bá oinsá fator sira seluk afeita ba pandemia. Maibé, to'o agora seidauk iha diskusaun barak kona-bákompleksidade hirak ne'e liga ho kontekstu Timor-Leste.

FM apresia tebes esforsu no susesu GoTL nian durante situasaun ida ne'ebé difisil tebes. Ami mos agradese tanba Timor-oan sira la sofre liu husi moras COVID-19 kompara ho nasaun seluk. Peritus no organizasaun barak fó avizu dehan meius hirak ne'e sei fo impaktu boot ba povu vulnerável iha mundu tomak, maske desizaun na'in sira la tuir avizu ne'e. Maibé, FM haree katak desizaun na'in sira ne'ebé maka responsável ba jestau COVID-19 iha Timor-Leste falha atu konsidera impaktu negativu husi meius estraordináriu sira ba populasaun Timor-oan ne'ebé hela besik liña pobreza. Iha relatoriu ne'e, FM aplika konseitu Human Security (Seguransa Umanu) ba ami nia observasaun durante krize COVID-19. Nune'e, ami espera relatoriu ne'e bele kontribui ba debate público liga ho asuntu importante ne'e, no mos ajuda desizaun na'in sira adapta política pública sira ba nesesiade no kontekstu Timor-Leste nian.

Atu ajuda política nain sira, sosiedade sivíl no parseiru internasional sira halo desizaun ne'ebé promove seguransa ekonomika, saúde no ben-estar en jerál, no direitu fundamental sira, FM fó rekomendasaun tuir mai:

- Timor-Leste enfrenta problema saúde estrutural balun ne'ebé kria moras no mate barak iha Timor-Leste, no rezulta husi pobreza, malnutrisaun no falta asesu ba bee-moos, saneamentu, uma diak, edukasaun, rendimentu no tratamentu saúde báziku. Durante krize COVID-19 ema Timor barak menus rendimentu, hahan, asesu ba servisus bázikus, no mos esperiénsia stres psikolojiku boot. Atu rezolve problema kompleksu hirak ne'e presiza planeamentu no investimentu ba tempu naruk hodi promove dezenvolvimentu ekonómiku ne'ebé igual, no mos hadia infraestrutura no servisus bázikus. Se Governu bele hadia kualidade moris populasaun no mos kualidade infraestrutura no servisus, ida ne'e bele rezolve fator sosial sira ne'ebé kria problema saúde público barak liu iha Timor-Leste.
- FM no grupu seluk sempre kestiona hahalok "copy-paste" política, lei no prática mai iha Timor husi nasaun seluk ho kontekstu no kapasidade ne'ebé la hanesan. Iha Marsu 2020, GoTL adopta meius emergencia maibé ladun konsidera impaktu negative ba povu nia moris, liu-liu ema kiak sira ne'ebé hala'o servisu informal. FM espera katak política nain sira sei asegura katak política hotu ne'ebé sira adopta tenke adapta lolos ba kontekstu Timor-Leste. Liu-liu wainhira política sei fo impaktu boot ba sosiedade hanesan meius kontra COVID-19. Tenke mos analiza didiak viabilidade, implementasaun no impaktu ba ema kiak sira nia moris.
- FM hakerek ona katak saúde público la signifika kontrola moras ida deit, maibé oinsá bele másimiza saúde diak ba populasaun tomak. Política sempre kria impaktu pozitivu no negative, no risku boot liu ba impaktu negativu iha nasaun sira ne'ebé

falta kapasidade no populasaun vulnerável ne'ebé boot. Saúde públiku lolos presiza vizaun luan kona-bá saúde individuu no sosiedade nian. Ida ne'e mos signifika presiza komprende oinsá intervensaun saúde fó impaktu ba fatór sosio-ekonomiku, ben-estar fíziku no psikolojiku no direitus umanus fundamentais.

- Timor-Leste nafatin obriga ema mai husi liur ne'ebé seidauk simu vasina ba COVID-19 tama iha kuarantina ba 14 dias. Husi perspetiva saúde públiku, política ida ne'e la iha lójiku, tanba COVID-19 sirkula tiha ona iha Timor laran, no dadus husi NASAUN barak hatudu katak ema ne'ebé vasina tiha ona mos lori virus no hadaet ba ema seluk. NASAUN barak para ona política kuarantina obrigatoria, maibe NASAUN ne'ebé kontinua obriga kuarantina maioria hatun ona durasaun ba iha loron lima deit. FM espera katak desizaun nain sira iha Timor-Leste bele hapara política sira ne'ebé diskrimina kontra ema no mos la'os bazeia ba evidencia ne'ebé iha ka praktika internasional.
- FM fó avizu iha 2021 dehan katak fó lisensa ba forsa seguransa sira atu interven iha sidadaun nia moris lor-loron sei hamosu violasaun direitus umanus, konflitu sosial no halo povu la fier estadu. Perigozu tebes iha kontekstu Timor tanba ita nia istória violénsia komunal no problema grave iha setor seguransa liga ho kapasidade, disciplina, lei no regras. Durante tinan balun nia laran, povu Timor barak la kontente ho governu tanba problema sosio-ekonómiku, impase político no korrupasaun. Iha situasaun ida ne'e, FM haree perigozu tebes wainhira implementa política ne'ebé provoka tan konflitu entre komunidade sira ho estadu.
- FM observa katak sekuritizasaun (securitization) ba pandemia global, iha ne'ebé polísia no militár sira implementa meius saúde públiku iha NASAUN barak, ne'e provoka debate boot kona-bá implikasaun husi krize COVID-19 ba direitu fundamental no relasaun entre sidadaun ho estadu. Analista barak hato'o preokupasaun kona-bá presidente ne'ebé COVID-19 kria ba krize saúde públiku iha future, no sira konsidera katak saúde públiku la bele konsidera hanesan kestaun polisiamentu ka defeza nasional. Tanba ne'e, FM husu sosiedade civil, media no governu atu hala'o diskusaun sériu kona-bá oinsá bele garante katak resposta ba emergénsia ruma iha future sei la impede direitu no liberdade fundamental sira, estraga ema nia moris ekonomiku no ekonomia nacional, no uza maneira militaristica ne'ebé provoka violasaun direitus umanus.
- FM observa katak GoTL, ofisial saúde públiku sira no ofisial seguransa seidauk entende ka aplika didiak *prinsípiu konsentimentu voluntáriu no informadu* (voluntary informed consent) wainhira implementa programa vasinasaun ba COVID-19. Ida

ne'e signifika la bele halo koerzaun ka obriga ema simu vasina liu husi presaun ka ameasa, no mos tenke fó informasaun kompletu kona-bárisku no benefísiu komparativu sira. Ema barak hetan ameasa dehan sira la bele tama servisu ka eskola karik la simu vasina, no populasaun boot simu vasina atu bele la'o livre ba munisípiu sira hodi hala'o atividade ekonómiku sira. Tanba ne'e, FM husu Governu atu foti meius konkretu hodi garante katak programa saúde púbiku la bele impoin ba ema nia direitu no dignidade, no mos tenke garante katak tratamentu saúde hotu sempre bazeia ba konsentimentu voluntáriu informadu, no la bele obriga liu husi koerzaun, presaun ka ameasa.

Atu hetan tan informasaun, favor bele haree relatóriu kompletu, ka bele kontaktu ba Fundasaun Mahein ho detalhu iha kraik:

Fundasaun Mahein

Email: mahein2009@gmail.com

Telemovel: (+670) 75771766

Website: www.fundasaunmahein.org